

**YANG AMAT BERBAHAGIA  
DATO SERI DR SITI HASMAH BINTI HAJI MOHD ALI  
DI MAJLIS PERASMIAN PROGRAM KEMPEN  
GERAKAN KELUARGA BAHAGIA  
DI NEGERI KELANTAN  
PADA HARI KHAMIS, 25 NOVEMBER 1999**

-----  
*"Bersama Keluarga ke Alaf Baru:  
Sehati, Sejiwa, Seharmoni"*

Bersyukur kita ke-hadrat Ilahi kerana dengan limpah kurnia dan izin-Nya dapat kita berjumpa pada pagi yang mulia ini bagi meraikan Sepuluh Tahun Pelaksanaan Program Gerakan Keluarga Bahagia. Saya juga mengambil kesempatan ini untuk mengucapkan terima kasih kepada Kementerian Perpaduan Negara dan Pembangunan Masyarakat di atas penghormatan yang diberikan kepada saya bagi merasmikan Majlis Program Kempen Gerakan Keluarga Bahagia Peringkat Negeri Kelantan.

2. Tema yang dipilih untuk kempen gerakan keluarga bahagia kedua ini iaitu "Bersama Keluarga Ke Alaf Baru: Sehati, Sejiwa dan Seharmoni" adalah wajar sekali. Saya percaya kita semua boleh bayangkan dalam kita melangkah ke alaf baru dan untuk mencapai status negara maju institusi keluarga akan berhadapan dengan pelbagai cabaran. Dalam hal ini keluarga sebagai unit asas dalam masyarakat perlu diberi sokongan dan perhatian dari semua pihak.

3. Kita ingin melihat institusi keluarga di negeri Kelantan terus kukuh dan berfungsi sebagai wadah pembentukan generasi yang cemerlang dan berkualiti. Membentuk kecemerlangan dan kebahagiaan dalam kehidupan berkeluarga bukanlah satu usaha yang mudah. Namun ianya bukanlah perkara yang mustahil untuk dicapai. Yang penting, setiap individu perlu sedar bahawa ianya banyak bergantung kepada usaha, azam atau iltizam dan keyakinan diri yang tinggi. Tidak dinafikan hampir ke semua pasangan suami isteri hari ini mengakui mereka tahu dan faham tentang peranan dan tanggungjawab masing-masing. Walau bagaimanapun tidak semua berkemahiran dan berkebolehan melaksanakan peranan dan tanggungjawab tersebut dengan baiknya. Di samping itu ramai yang didapati lalai dan hanyut dalam arus pembangunan sehingga keluarga menjadi mangsa keadaan.

4. Sehubungan dengan ini, pembentukkan keluarga yang sehati, sejiwa dan seharmoni menuntut setiap ahli mengamal nilai-nilai positif seperti hormat- menghormati, bertolak ansur, maaf-memaafi dan seupamanya. Sebaliknya, nilai-nilai negatif seperti tidak bertolak ansur, bersikap kasar, selalu tidak berpuashati dan sebagainya perlu dikurangkan malah dikikis sama sekali. Secara tradisi, bapa selaku ketua keluarga di samping berperanan sebagai pencari nafkah utama perlu menjaga kepentingan keluarganya, bertanggungjawab dan tidak bersikap melepas tangan. Sementara ibu pula, bersesuaian dengan sifat lemah lembutnya, berperanan

menyemai dan memupuk nilai-nilai murni serta membaja perasaan setiap ahli keluarganya dengan kasih sayang, sentuhan kemesraan dari segi fizikal dan emosi serta sebagai pendorong dan penasihat.

5. Seseorang bayi itu dilahirkan suci dan fitrah. Ibu bapalah yang mencorakkan kehidupannya sama ada dia menjadi sempurna ataupun sebaliknya. Tanggungjawab tersebut tidak pernah berakhir. Bermula dengan kehadiran janin di alam rahim dan berterusan hingga kita menutup mata. Di sepanjang tempoh kehamilan, ibu bapa bertanggungjawab menjaga pemakanan, keselamatan dan memberi perangsangan yang sesuai. Apabila dia lahir, dia memerlukan penjagaan rapi serta perlindungan dan kawalan ibu bapa kerana dia merupakan golongan yang sangat sensitif. Ketika dia meningkat remaja pula, emosinya sentiasa melonjak. Lonjakan itu perlu diawasi dan dibimbing serta diimbangi dengan nilai-nilai murni dari semasa ke semasa. Apabila dia melangkah ke alam dewasa dan seterusnya berkeluarga, tugas dan tanggungjawab ibu bapa masih berterusan dengan memberi tunjuk ajar, teguran dan nasihat berguna kepada ahli keluarganya.

6. Sebagai teras kepada keutuhan dan kebahagiaan keluarga, pegangan agama dan amalan nilai-nilai murni adalah sangat penting. Orang dewasa perlu menjadi contoh kepada anak-anak dan generasi muda. Dalam masa yang sama, semua ahli keluarga perlu mengamalkan gaya hidup sihat dan cergas, mempunyai daya ketahanan fizikal dan mental yang kuat di samping berbagai kemahiran hidup yang perlu untuk merealisasikan wawasan sesebuah keluarga itu.

7. Wawasan keluarga tidak akan tercapai jika keluarga tersebut hidup dalam keadaan miskin dan daif yang tidak dapat memenuhi kehendak dan keperluan setiap ahli. Kemiskinan keluarga juga sering dikaitkan dengan kadar kematian ibu dan bayi yang tinggi. Saya difahamkan, usaha-usaha kerajaan sejak dua dekad yang lalu bagi mengurangkan kadar kemiskinan kini telah membuahkan hasil yang dapat dibanggakan. Di samping Program Pembangunan Rakyat Termiskin atau PPRT, Program Pertubuhan Bukan Kerajaan, khususnya Amanah Ikhtiar Malaysia (AIM) dan pelbagai yayasan pembasmian kemiskinan di peringkat negeri turut menyumbang ke arah peningkatan pendapatan keluarga termiskin dan seterusnya mengurangkan kadar kemiskinan. Atas usaha-usaha tersebut, kadar kemiskinan telah mencatat kadar yang amat membanggakan. Walau bagaimanapun, kadar kemiskinan di Kelantan masih lagi tinggi berbanding dengan negeri-negeri lain. Oleh yang demikian, beberapa program khusus untuk menjana pendapatan keluarga terutamanya di kawasan-kawasan miskin di negeri ini akan terus diusaha dan dilaksanakan.

8. Saya difahamkan usaha telah dijalankan oleh pelbagai pihak khususnya Kementerian Perpaduan Negara Dan Pembangunan Masyarakat bagi memantapkan keusahawanan wanita negeri Kelantan untuk menyumbang ke arah peningkatan pendapatan keluarga.

9. Bagi tujuan Pembangunan Keluarga, Lembaga Penduduk Dan Pembangunan Keluarga Negara terus meningkatkan usaha ke arah yang sama dengan melaksanakan program-program pemantapan keluarga melalui penerapan nilai-nilai murni bagi melahirkan keluarga yang peka, berilmu, matang dan berkualiti. Di bawah program latihan dan pendidikan, LPPKN telah

merangka dan membangunkan modul-modul pendidikan kekeluargaan dan keibubapaan khusus untuk golongan remaja, pasangan baru berkahwin, ibu bapa yang mempunyai anak kecil serta anak remaja.

10. Saya juga ingin menyarankan supaya 'semangat kejiranan' yang menjadi tradisi kita, dapat dikekalkan dalam masyarakat Malaysia. Golongan muda seharusnya menghormati dan menyayangi yang tua sementara yang tua berperanan memberi nasihat dan tunjuk ajar berdasarkan pengalaman mereka.

11. Walaupun peranan ibu bapa itu penting dalam melahirkan sebuah keluarga bahagia, sokongan dari pihak-pihak lain juga adalah perlu supaya lebih berkesan. Dalam membentuk satu bangsa Malaysia yang sehati, sejiwa dan seharmoni, saya berharap agar kementerian dan agensi-agensi kerajaan, swasta dan NGOs tidak mengabaikan peranan dan tanggungjawab sosial masing-masing.

12. Peranan media massa yang kreatif di dalam menyampaikan mesej-mesej yang sesuai boleh mendidik masyarakat supaya berubah sikap dan seterusnya mengamalkan nilai-nilai yang sewajarnya ke arah membina keluarga yang bahagia.

13. Pengetahuan yang mendalam mengenai isu-isu kekeluargaan adalah penting. Usaha penyelidikan mengenai kekeluargaan perlu dilaksanakan secara berterusan untuk dijadikan panduan dalam pembentukan strategi dan program bagi memenuhi keperluan keluarga dan memantapkan keutuhannya di samping menggalakkan pendekatan yang inovatif mengenai isu-isu kekeluargaan.

14. Justeru itu, sempena dengan kempen gerakan keluarga bahagia ini, saya menyeru kepada ibu bapa yang berada di dewan ini agar sentiasa memainkan peranan dan tanggungjawab masing-masing ke arah pembinaan keluarga yang kukuh bersatu hati dan jiwa. Binalah satu keluarga yang menjadi kebanggaan negara kita atau 'A Pride To The Nation' iaitu sebuah keluarga yang sentiasa hidup dalam keadaan harmoni dan berkasih sayang, saling menghormati, bantu membantu dan mempunyai hubungan yang kukuh lagi intim di kalangan setiap ahli keluarga. Mudah-mudahan kita dapat melangkah ke alaf baru dengan penuh yakin serta dapat menghadapi segala cabaran yang menanti.

15. Dengan lafaz Bismillahirrahmanirrahim dengan rasminya saya melancarkan "Program Kempen Gerakan Keluarga Bahagia bertemakan: Bersama Keluarga Ke Alaf Baru: Sehati, Sejiwa, Seharmoni" peringkat negeri Kelantan.

\*\*\*\*\*